

दिनांक 01.08.2024

समय: 18.45 बजे

आकाशवाणी जयपुर-अजमेर  
प्रादेशिक समाचार

- प्रदेश मांय केई ठौड़ां ज़ोरदार बिरखा ऊं जिंदगी माथे असर पड़्यो-जयपुर मांय बिरखा रे कारण व्ह्या हादसा मांय चार जणां री मौत ।
- वित्त आयोग रो दल प्रदेश रा दो दिन रा दौरा माथे-मुख्यमंत्री अर आला अहलकारां सागे मीटिंग कीनी ।
- सुप्रीम कोर्ट अनुसूचित जाति-जनजाति मांय उप-वर्गीकरण ऊं जुड़ी राज्यां री ताकत ने बरकरार राख्यी ।
- पेरिस ओलंपिक री निशानेबाजी होड़ मांय भारत रा स्वप्निल कुसाले ई कांसा रो तमगो जीत्यो ।

000

प्रदेश मांय ज़ोरदार मेह बरस रह्यो है । जयपुर मांय एक ही दिन मांय डेढ़ सौ मिलीमीटर बिरखा दर्ज करीजी, जो साल 2015 पाछे व्ही सब ऊं बत्ती बिरखा है । काल सिंज्या ऊं लगातार बरस रह्या मेह रे कारण शहर रा केई हलकां मांय पाणी भर ग्यो । विश्वकर्मा औद्योगिक हलका मांय तहखाना मांय पाणी भर जावण रे कारण एक ही पिरवार रा 3 जणा री मौत व्हे ग्यी । मुख्यमंत्री भजन लाल शर्मा मरण वाळा रा पिरवार वाळां सारू 4-4 लाख रूप्या आपदा राहत कोष ऊं अर एक-एक लाख रूप्या मुख्यमंत्री सहायता कोष ऊं मंजूर कीना है । वे आपदा प्रबन्धन विभाग ने मुस्तैद रेहवण रा हुकम ई दीना । ई बीचे उपमुख्यमंत्री दिया कुमारी विश्वकर्मा औद्योगिक हलका रो दौरा कर र हालात री जाणकारी लीनी । वे कह्यो के घणी बिरखा रे कारण परेशान लोगां ने मदद देवण सागे ई हलका मांय पाणी भरण री समस्या हमेशा सारू दूर करी जावेला ।

.....

जयपुर ग्रामीण जिला रा बगरू हलका मांय बरसाती पाणी रा तेज बहाव मांय बह जावण ऊं एक बाळक री मौत व्हे ग्यी। जयपुर कने जामडोली मांय सड़क धंस जावण ऊं कुछ गाड़ियां जमीं मांय धंस ग्यी, हालांकि किण ई भांत रो जान रो नुकसाण व्हेवण रा समाचार नी है। जयसिंहपुराखोर कने दो मंजिल रो एक मकान पड़ ग्यो। जिला कलेक्टर प्रकाश राजपुरोहित वाकया री ठौड़ रो दौरो कर र बचाव रा काम रो निरीक्षण कीनो। श्रीगंगानगर अर आरे-सारे रा हलकां मांय ई चौखी बिरखा व्ही है। सूरतगढ़ हलका मांय जोरदार मेह बरस्यो। हनुमानगढ़ जिला रा नोहर मांय ई बिरखा पाछे सड़कां माथे पाणी भर ग्यो। टोंक मांय व्ही तेज बारिश पाछे नदी-नाळा उफण रह्या है। जिला कलेक्टर डॉ. सौम्या झा पीपलू समेत जिला रा घणी बिरखा वाळा हलकां रो दौरो कर र हालात रो जायजो लीनो अर अहलकारां ने जरूरी हुकम दीना। चूरू मांय ई रात ऊं ई बिरखा व्हे रही है। शहर रा केई गेलां माथे पाणी भर ग्यो है। बांसवाड़ा मांय आज करीब एक घंटा ताई झमाझम बिरखा व्ही। **सवाईमाधोपुर** मांय ई आखा दिन व्ही बिरखा ऊं गर्मी ऊं साता मिली है।

00000

16वां वित्त आयोग रा अध्यक्ष अरविंद पनगड़िया री अगुवाई मांय आयोग रा सदस्यां रो एक दल प्रदेश रो दौरो कर रह्यो है। दो दिन रा दौरा रा पैला दिन आज आयोग रो दल मुख्यमंत्री भजनलाल शर्मा सागे मुलाकात कीनी। दल मांय वित्त आयोग रा अध्यक्ष सागे सदस्य अजय नारायण झा, एनी जॉर्ज मैथ्यू, डॉ. मनोज पाण्डा, डॉ. सौम्य कांति घोष अर सचिव रित्विक पाण्डे शामिल है। ई मौके उप मुख्यमंत्री दिया कुमारी अर मुख्य सचिव सुधांश पंत ई मौजूद हा। राज्य रा वित्त विभाग रा अतिरिक्त मुख्य सचिव अखिल अरोड़ा आयोग रा दल सामी एक प्रजेंटेशन ई पेश कीनो। खबरनवीसां सागे बातचीत रे दौरान पनगड़िया बतायो के प्रजेंटेशन मांय राजस्थान रा खास हालात रो जिक्र करी ज्यो है अर राज्यां ने केन्द्र ऊं मिलण वाळी रकम रा बारा मांय ई खास सुझाव दिया ज्या है।

.....

पनगड़िया बतायो के आयोग हाल ताई तीन राज्यां रो दौरो कर चुक्यो है अर राजस्थान चौथो राज्य है। आज आयोग रो दल नगरीय निकाय संस्थावां रा नुमाइंदा, उद्योग अर कारोबार जगत अर सियासी पार्टियां रा नुमाइंदा सागे ई मीटिंग कीनी। आयोग रो काल पंचायती राज रा नुमाइंदा सागे मीटिंग करण रो कार्यक्रम है।

0000

प्रदेश मांय चोरी, लूटपाट अर दूजी वारदातां माथे रोक लगावण सारू सरकार गंभरता ऊं कोशिश कर रही है। विधानसभा मांय पूछी ज्या पूरक सवाला रा जवाब मांय गृहमंत्री री ओर ऊं चिकित्सा अर स्वास्थ्य मंत्री गजेन्द्र सिंह खीं वसर बतायो के राज्य मांय संगठित अपराध रोकण सारू लारला साल दिसम्बर महीना मांय एंटी गैंगस्टर टास्क फोर्स बणायी ज्यी ही। ई रे अलावा हर जिला मांय पुलिस निरीक्षक री अगुवाई मांय 7 ऊं 15 पुलिस वाळा री खास टीमा बणायी ज्यी है।

000

केन्द्रीय गृह राज्य मंत्री नित्यातनंद राय आज लोकसभा मांय आपदा प्रबंधन (संशोधन) बिल 2024 पेश कीनो। ओ बिल साल 2005 रा आपदा प्रबंधन कानून मांय बदलाव सारू पेश करी ज्यो है। इण रो मकसद राष्ट्रीय आपदा प्रबंधन प्राधिकरण अर राज्य आपदा प्रबंधन प्राधिकरणां रा काम ने और बेहतर बणावणो है। बिल मांय राज्यां री राजधानी अर नगर निगम वाळा मोटा शहरां सारू शहरी आपदा प्रबंधन प्राधिकरण बणावण रो प्रावधान करी ज्यो है। बिल मांय राज्य सरकारां कानी ऊं राज्य आपदा मोचन बल बणावण रो ई प्रावधान करी ज्यो है।

000

सुप्रीम कोर्ट आरक्षण रो फायदो देवण सारू अनुसूचित जाति अर जनजाति रा उम्मीदवारां ने वां रां पिछड़ापन रा आधार ऊं न्यारा-न्यारा उप वर्गां मांय बांटण री राज्यां री ताकत ने बरकरार राख्यी है। मुख्य न्यायाधीश न्यायमूर्ति डी वाई चंद्रचूड़ री अगुवाई वाळी सात न्यायाधीशां री पीठ साल 2004 रा ई वी चिन्नैया रा फैसला ने छह रे मुकाबले एक वोट ऊं खारिज कर दीनो। ई फैसला ऊं न्यायमूर्ति बेला त्रिवेदी असहमति जताई। साल 2004 रा फैसला मांय कही ज्यो हो के अनुसूचित जाति अर जनजाति रा उम्मीदवारां ने उप वर्गां मांय बांटणो संविधान रा अनुच्छेद 341 रे खिलाफ है, जो राष्ट्रपति ने अनुसूचित जाति अर जनजाति रा उम्मीदवारां री लिस्ट बणावण री मंजूरी देवे है।

00000

.....  
पेरिस ओलिंपिक रा छठा दिन आज भारत रा निशानेबाज स्वप्निल कुसाले पुरुषां री 50 मीटर राइफल 3 पोजीशन मांय कांसां रो तमगो जीत्यो। ई सागे ई वे पुरुषां री 50 मीटर राइफल 3 पोजीशन होड़ मांय ओलिंपिक तमगो जीतण वाळा भारत रा पैला निशानेबाज बण गया है। राष्ट्रपति द्रौपदी मुर्मू स्वप्निल कुसाले ने कांसा रो तमगो जीतण परां बधाई देता थकां सोशल मीडिया पोस्ट रे जरिये कह्यो के ओ पहली दफा व्ह्यो है जद भारत एक ही ओलिंपिक री निशानेबाजी होड़ मांय तीन तमगा जीत्या है। उपराष्ट्रपति जगदीप धनखड़ अर प्रधानमंत्री नरेन्द्र मोदी ई स्वप्निल कुसाले ने कांसां रो

तमगो जीतण परां बधाई दीनी है। राज्यपाल हरिभाऊ किशन राव बागडे ई स्वप्निल ने बधाई देता थकां कहयो के वां री कामयाबी देश सारू नाज करण रो मौको है। दूजी कानी, मुक्केबाज निकहत जरीन 50 किलोग्राम भार वर्ग रा मुकाबला मांय चीन री अक्वल खिलाड़ी वू यू ऊं हार गयी। पुरुष हॉकी मांय ई भारत ने बेल्जियम रे खिलाफ 2-1 ऊं शिकस्त रो सामो करणो पड्यो।

00000

श्रीगंगानगर ज़िला रा सूरतगढ़ री फौजी छावनी मांय 'अपनी सेना को जानें' अभियान रा तहत 'वेलर इन प्लेंटी' ब्रिगेड री ओर ऊं 3 अगस्त ने फौजी साज-ओ-सामान अर बैंड री प्रदर्शनी लगायी जावेला। इण मांय तोपखाना रा असलाह, तोपां, मेकेनाइज्ड इन्फेंट्री रा वाहन अर फौजी टैंक भेळा व्हेला। प्रदर्शनी रे दौरान फौज मांय भेळा व्हेवण रा मौकां रा बारा मांय ई जाणकारी दी जावेला। ई सागे ई अग्निवीर योजना रा बारा मांय ई बतायो जावेला।

0000

जैसलमेर जिला री न्यारी-न्यारी ग्राम पंचायतां मांय आज जन सुणवाई रा कार्यक्रम राख्यी ज्या। जिला कलेक्टर प्रताप सिंह भणियांगा उपखण्ड री भणियांगा ग्राम पंचायत मांय जनता री परेशानियां सुणी अर अहलकारां ने जरूरी हुकम दीना। वे गांव वाळां ऊं पाणी अर बिजली री पूर्ति ऊं जुड़ी जाणकारी लीनी अर अहलकारां ने पूर्ति मांय सुधार लावण रा हुकम दीना। बाड़मेर रा ज़िला कलेक्टर निशान्त जैन भियाड़ ग्राम पंचायत मांय जनता री समस्यावां री सुणवाई कीनी। केकड़ी री ज़िला कलेक्टर श्वेता चौहान आज मोलकिया ग्राम पंचायत मांय पाणी, बिजली अर जमीं रा मुआवजा ऊं जुड़ी समस्यावां समेत न्यारी-न्यारी परेशानियां सुणी अर अहलकारां ने जरूरी हुकम दीना। पाली रा जिला कलेक्टर एल एन मंत्री सोजत ब्लॉक रा सिंगारी राजीव गांधी सेवा केन्द्र मांय जनसुणवाई कीनी। वे सेवा केन्द्र मांय पौधा ई रोप्या। डीग री ज़िला कलेक्टर श्रुति भारद्वाज नगर उपखंड रा तरोंडर मांय जनसुणवाई कीनी।

0000

प्रदेश मांय नान्हा टाबरां रा स्वास्थ्य मांय सुधार लावण रा मकसद ऊं आज स्तन पान सप्ताह सरू करी ज्यो। ई सप्ताह री थीम "क्लोजिंग द गेप : ब्रेस्ट एंड फीडिंग सपोर्ट फॉर ऑल" राख्यी ज्यी है। ई मौके बांसवाडा मांय चिकित्सा कर्मचारी स्तन पान ने बधावो देवण री शपथ लीनी। कटुंबी रा आंगनबाड़ी केंद्र मांय बच्चां ने दो साल री उम्र ताई मां रो दूध पावण अर एनीमिया, पोषण, मौसमी बीमारियां, हाथ धोवण, टीका लगावण अर परिवार नियोजन रा साधनां रा बारा मांय जाणकारी दीरीजी। डूंगरपुर रा श्री हरिदेव जोशी सामान्य चिकित्सालय मांय जिला कलेक्टर अंकित कुमार सिंह री

मौजूदगी मांयं विश्व स्तनपान सप्ताह रा कार्यक्रम सरू करी ज्या। ई मौके मां रो दूध पावण ने बधावो देवण रा संकल्प पत्र भरायी ज्या। झालावाड़ मांयं ई मायडां कानी ऊं दूध पावण ने बधावो देवण बाबत संकल्प दिरायी ज्यो। जैसलमेर मांय राख्यी ज्या कार्यक्रम मांय आस वाळी लुगाइयां ने बच्चां ने पहला 6 महीना तांई केवल खुद रो दूध पावण रा बारा मांय जाणकारी दीरीजी।

000